

# INUIT ATAQATIGIIT

## INATSISARTUNI



UKA 2015/21  
3. november 2015  
Aqqaluaq B. Egede

### **Uunga siunnersuut: Qalerallit avaleraasartuullu avataasiorluni aalisarnermi pisarineqartut akitsuutaat pillugit Inatsisartut inatsisaata allanngortinneqarnera pillugu Inatsisartut inatsisaat nr. x, xXx 2015-imeersoq (Aalisakkat ikerinnarsiortut ilaasa Tunumi pisarneqartut akitsuutaat)**

(Aningaasaqarnermut Aatsitassanullu Naalakkersuisoq)

Inuit Ataqatigiit siunnersueqataavugut nunatsinni aningaasarsiornikkut ilungersunartorsiortumi aqqissuussiumalluta. Meeqqat inuusuttut utoqqaallu nunatsinni inuuniarnikkut atugaat sallertut ajorseriartinnaveersaarpagut. Piumasaqaatigaarput nunatsinni inuit, pingaartumik inuit pissakinnerit pisariaqartitsinerusullu siullertut tikkuarneqassanngitsut pilliuteqaqqullugit, aamma akiliineroqqullugit inuit sinnerisa aamma isertitaqarnerusut atugaannik qulakkeerinneqqullugit.

Inuit Ataqatigiit parti saamerliusutut imminut naqissusertoq isumaga malillugu ajunngivissumik tunngavimminik attassisoq massakkut naqissuserpara.

Aningaasarsiornikkut suleqatigiilluta iluarsartuusseqqinnissarput pisariaqarpoq. Naqissuserusupparali qinikkat piumaffigineqaratta peqatigiilluta, piffissaqarluta, oqallisigilluarlugit pipallataannngitsunik aqqissuusseqqinnissarput kaammattuutigineqarmat. Inuit Ataqatigiit isumaqarpugut siunnersuut una assersuutissaalluortoq aamma takussutissaalluortoq naalakkersuisut pipallatamik, illua-tungeriinnilu ataatsimoorussaannngitsunik aqqissuusseqqinniarnermik ingerlatsinerannut.

Tassami oqaatigineqarpoq qalerallit immannguaannaq suliat suliarineqanngitsulluunniit akitsuusersornerisigut nunatsinni suliffissat, taamatullu aamma akileraarutit A-nit isertitat amerlanerulernerannik kinguneqarumaartoq. Assortorneqarsinnaannngilarli oqassagutta imak: "Immaq!".

Tassami qalerallit naammattumik suliarineqarsimannngitsut akitsuuserniarlugit isertitassanik nutaanik missingersuusiortoqarsinnaannngilaq tunitsiviit qalerallit suliarisimappatigit isertitassat isinngitsoortussanngorlugit Inatsisartut Aningaasanut Inatsisiliortillugit. Taamaaliorneq Naalakkersuisut Namminersorlutik Oqartussat Missingersuusiortarnermut Malittarisassat unioqqutissagaat Inuit Ataqatigiit isumaqarpugut.

Taasami Missingersuusiortarnermut Malittarisassat ima oqaasertaqarput:

*"Missingersuutitut ilanngussat tassaapput aningaasaliissutini pineqartuni aalajangiinissamut Inatsisartunut tunngavissat taamaalillutillu tulleriarinissamut Inatsisartut isumaliuteqarnerannut ilaallutik. Taamaattumik pingaaruteqarpoq missingersuutitut ilanngussat tunngavittut tatiginartuunissaat, tassa aningaasaliissutitut tunuliaqutaasut siunertarlu, iluanaaruteqarnissamut ilimagisat, ingerlatsineq, naammassisaqarsinnaaneq il.il. naammaginartumik allaaserineqarsimapput."*

Allatut oqaatigalugu, qalerallit suliarineqanngitsut akitsuutaat isertitassatut missingersuusiut qalerallit suliarineqarnerisigut isertinngitsoorneqassapput. Imaappoq, piviusorsiortumik missingersuusiortussaataitanerput matumani sanioqqutaarlugu Inatsisartunut ilaasortat aalajangiitinniarneqarnerat mianersuuttariaqarpoq.

Siunnersuut malillugu qalerallit suliarineqanngitsut akitsuutaat tunitsiviit atulissagaluarpassuk taava aamma akileraarutit A-tut isertinniarneqartut isertinngitsoorneqassapput. Inuit Ataqtigiiit tupigilluinnarparput Naalakkersuisut inatsisartunut aalajangiiffigeqqusaat taamak malittarisassanut atuuttunut uniuutsigimmat.

Avaleraasartuut qalerallillu avataasiorluni pisarineqartut pillugit Aningaasat 20 mill. Naalakkersuisut isertitsissutissatut missingiussaata qanoq katitigaappat? Naak missingersuutit naatsorsorneri, naak aningaasanut inatsimmi isertitassanik missingersuineri tunngavilersortussaataitanermik piunasaqaatip naammassineqarnera?

Akissut tassaavoq, naalakkersuisut massakkuugallartoq tunngavilersuisinnaanertik killeqartoq oqaatigimmassuk.

Taamaattorli naalakkersuisut saqqummiussaani issuaavunga imaattunik: *"Angallatini aalisakkani ikerinnaasiortuni aalisartuni inuttat aalisarnermi pisat naapertorlugit akissarsisinneqartarpata, akitsuullu akissarsianit tamarmiusunit ilanngaatigineqassappat tamanna inuttat akissarsiamikkut aamma malugissavaat"*.

Tassa imaappoq, akitsuut aaniarneqartoq tunitsiviup pisisartup allallu akiligassaattut takorluugaq inatsisip saqqummiunneqartup oqaasertaani aalisariutit inuttaasa akilissagaat naalakkersuisut tunngavilersuutigaat.

Inuit Ataqtigiiit siunnersuummi anguniarneqartut ilaai isumaqatigaluarpagut, soorlu avaleraasartoorniarnermi avataasiorlunilu aalisarnermi allannguutissatut siunnersuutaasut eqqartorneqarsinnaagaluartut suliaq tukappallaamik, aamma pipallataavallaamik suliaq akuerisinnaangilarput. Missingersuutini aningaasat isertitassat matumani pineqarput, tunngavilersugaanngillat, aamma tutsuiginartumik peqqissaartumillu suliaanngillat.

Taamatut oqaaseqarluta siunnersuut missinersuusiortarneq pillugu malittarisassanut naapertuuttumik suliarineqarsimangilaq. Taamaammatt Inuit Ataqtigiiit inassutigiarput Inatsisartunut ilaasortat malittarisassanut tunngaveqarlutik siunnersuut itigartissagaat.